

食施獲五福報經

亦名佛說施色力經

失譯人名今附東晉錄

聞如是一時佛遊舍衛國祇樹給孤獨園是時佛告諸比丘衆當知食以節受而名損佛言人持飯食施人有五福德智者消息意度弘廓則有五福德道何謂爲五一曰施命二曰施色三曰施力四曰施安五曰施辯何謂施命一切衆生依食而立身命不得飯食不過七日奄忽壽終是故施食者則施命也其施命者世世長壽生天世間命不中天衣食

自然財富無量何謂施色得施食者顏色光澤不得食時忿無潤形面目憔悴不可顯示是故施食者則施顏色其施色者世世端正生天世間姿貌煒煒世之希有見莫不觀稽首爲禮何者施力人得飯食氣力强盛舉動進止不以爲難不得食者飢渴熱惱氣息虛羸是故施食則施力也其施力者世世多力生天世間力無等雙出入進止而不衰耗何謂施安人得飯食身爲安隱不以爲患不得食者心愁身危坐起無賴不能自定是故施

食則施安也其施安者世世無患心安身強
生天世間不受衆殃所可至到常遇賢良財
富無數不中天傷何謂施辯得施食者氣充
意強言語通利不得食者身劣意弱不得說
事口難發言是故施食則施辯才其施辯者
世世聰明生天世間言辭辯慧口辯流利無
一瑕穢聞者喜悅莫不戴仰是五福德施若
發道意施於一切既得此福所生之處常見
現在佛諮受深法四等四恩六度無極三十
七品法身現相壽命無窮相好分明三十二

相致十種力以成佛道爲立大安普濟危厄
智慧辯才出萬億音度脫十方佛說是經時
諸比丘衆天龍鬼神四部弟子莫不歡喜作
禮而去

食施獲五福報經

頻毗娑羅王詣佛供養經

西晉沙門釋法炬譯

聞如是一時婆伽婆在舍衛城祇樹給孤獨
園與大比丘衆千二百人俱爲人敬仰悉來
供養比丘比丘尼優婆塞優婆夷大王太子